

Ke disakarete tsa boleng ba R10-million tse neng di tsebahaditswe e le pampiri ya ntlwaneng

Tshwane, 5 Phato 2021 – Bahlanka ba Bolaodi ba Meedi ba Ditshebeletso tsa Lekgetho tsa Afrika Borwa (SARS) ba hapile disakarete tse seng molaong tse neng di tsebahaditswe e le pampiri ya ntlwaneng tsaa boleng ba tjelele e kana ka R10 million mane boemakepeng ba Durban mafelong a fetileng a beke.

Kgapo ena ya Durban e latela letsholo le bileng teng mane Cape Town matsatsing a mmalwa a fetileng moo ho ileng ha hapuwa disakarete tse seng molaong tsa boleng ba R6-million, sena se tlisa paloyohle ya boleng bo hapilweng ho ba tjhetele e kana ka R16-million.

Kgapo ena ya Durban e latela lesedi le fumanweng mabapi le setshelo se tswang naheng e nngwe ya botjhabela ba Asia seo dikateng tsa sona di neng di sa tsebahatswa ka nepo mme ho thwe ke pampiri ya ntlwaneng.

Ka lebaka la merusu e bileng teng pejana mona KwaZulu Natal, sekepe se ile sa dieha ho fihla boemakepeng mme setshelo sena se ile sa lokollwa feela ka la 16 Phupu 2021. Le ha ho le jwalo, eitse hang feela ha setshelo sena se hlahlobilwe ke mokgwatshebetso wa Transnet, ho ile ha fumanwa hore se kentse disakarete tse seng molaong, tseo hape e leng tsa mokokotelo.

Hanghang ka mora merusu ena, ho bile le tiehiso ka lebaka la mekgwatshebetso ya Transnet, e bakileng hore ho boele ho be le ditiehiso tse ding hape boemakepeng. Eitse ha boemakepe bo ntse bo iphumana hape, setshelo sena se ile sa lokollwa boemakepeng ka la 28 Phupu 2021.

Ka mora diphenyo tse matla, ka la 29 Phupu 2021, ho ile ha lemohuwa hore morwalo ona o ile wa lebiswa polokelong e mane Old North Coast Road mane Glen Anil. Ka la 30 Phupu, ho ile ha fumanwa lengolo le dumellang ho phenya mane Lekgotleng la Makgistrata wa Verulam mme SARS ya kena mapatlelong ana. Ka hara polokelo ho fumanwe makase a 950 a disakarete tsa 14mg tsa Pacific (e leng sehlahiswa se seng molaong) mmoho le mabokose a 50 a pampiri ya ntlwaneng.

Dithoto tsena di ile tsa hapuwa mme tsa behwa Polokelong ya Mmuso ya SARS. Ho butswa nyewe ya bonokwane le Ditshebeletso tsa Sepolesa sa Afrika Borwa mme diphuputso di tswela pele.

Khomishenara ya SARS o rorisitse boikitlaetso ba Bahlanka ba Bolaodi ba Meedi ka ho qetella ba fihlile sebakeng seo sa polokelo le ha ba ne ba tjamelane le mathata.

“Bahlanka ba rona ba Bolaodi ba Meedi ba utlwisisa bohlokwa ba ho thibela dithoto tse seng molaong, tse kang disakarete, ho kena ka Afrika Borwa hobane di senya indasteri ya lehae mme di bake ditahlehelo tsa mesebetsi.

“Diketso tsena tsa bona ke bopaki ba hore SARS e keke ya mamella ho se ikobele tefo ya lekgetho ka molefalekgetho ofe kapa ofe le hore re tla thatafalletsa le ho etsa hore dintho di be theko e hodimo bakeng sa bohle ba iphaphanyang le melao ya naha ya rona,” ho rialo Mong. Kieswetter.